

«Affons bein scolai ha pli gronda prioriad ch'ils resultats»

Rodund 180 junioras e juniors vegnan trenai dalla cuminonza d'interess dils clubs da ballapei dalla Surselva. Pli u meins tuts dattan en ina ligia ni l'otra. La finamira dils responabels Daniel Carigiet e Roland Casutt ei denton buca en emprema lingia ils resultats. Prioriad hagi ina buna scolaziun e giugadurs motivai.

Hans Huonder/FMR

Dapi plirs onns coopereschan ils clubs da ballapei da Laax, Lumnezia, Schluein Glion, Rueun, Danis-Tavanasa, Trun/Rabius e Sedrun/Mustér el trenament dallas junioras e dils juniors. Il motiv per la collaboraziun ei sempels: Il diember d'affons ei sesminuius ils davos onns e biars clubs vegnan aschia buca pli da formar equipas pil campinadi. Abstrahau da quei factur en sesez negativ, dat ei denton era in positiv: Ils megliers san dar denter els en ina categoria pli aulta e san aschia vegnir promovì. Quels che dattan ballapei plitost pil divertiment ed esser da cumpignia, ein dalla partida en categorias meins aultas, mo han tuttina la pussevividad da dar in campinadi.

Ina clara structura

Ils siat clubs da ballapei ein s'organisai ella Gruppa d'interess per promover il ballapei dils juniors en Surselva. Dapi che quella ei formada vegnan mintgamai denter 170 e 200 junioras e juniors trenai. Igl ei affons naven dallas empremas classas primaras entochen giuvenils egl emprendissadi ni ina scola professiunala. A basa d'in contract, reglaments e carnets da duers vegnan las incaricas dil tgamun dalla gruppa e dils trenaders reglai. Al tgamun ei ina cumissiun culs presidents dil clubs suandada d'in team da menaschi ed ils trenaders. «Dapi 2019 ei la structura vegnida adattada ed optimada successivamein. Aschia havein nus per exempel viu ch'igl interess da surpender ils posts dil president dalla cumissiun e dil coordinatur ei buca gronds. L'idea era che quels posts mondien en roda», di *Daniel Carigiet* che presidescha la gruppa. 16 trenaders procuran ils trenaments dils juniors da differentas ligias e categorias. Anflar quels ei medemamein buca sempel. «Il mument havein nus in diember sufficient, mo pigl atun vegnent tscherchein nus aunc enqualin. Survegnir persunas qualificadas per quels posts ei relativamein grev», di *Roland Casutt* ch'ei coordinatur digl entir menaschi da juniors.

«Nus duvrassen in instructor»

Schegie ch'ina part dils trenaders ha in diplom sco trenader, lavuran auters cun in manual. «Tuts fan il pusseivel, mo ei fuss bien sche nus havessen in instructor che savess serender las seras als trenaments e dar cussegls. Ina persuna che fa quei lu praticamein mintga sera stuess haver in'aulta qualificaziun, quei che pretendess era in'indemnisaziun. Quei savein nus denton buca selubir», di *Roland Casutt*. Tuts funcziunaris dalla cuminonza d'interess – inclusiv ils trenaders – lavuran gratuitamein. Sulettamein ina pauschala per spesas vegn messa

a disposiziun. «Nus havein menau discuors cun instanzas politicas dalla regiun e cull'Uniun da ballapei grischuna, senza denton haver success. Sche nus secumparegliein culla scola da musica che vegn sustenida finanziamein dil maun public, havein nus semplamein in grond disavantatg», puntuescha Daniel Carigiet ch'ei era president dall'Uniun sportiva Danis-Tavanasa.

«Ei va era senza fusiunar»

La finamira dalla cuminonza ei da dar als affons e giuvenils la pusseivladad da dar ballapei e da semesirar cun camerats dalla medema vegliadetgna. «Il plascher duei star el center, vul dir: Affons scolai e buca resultats», puntuescha Roland Casutt. Ils ambiziunai seigien per ordinari era ils megliers, mo era ils auters dueigien saver guder il sport. Ton Daniel Carigiet sco Roland Casutt constateschan che la collaboraziun denter ils clubs e lur responsabels funcziuna fetg bein: «Ei va era senza fusiunar. Ils clubs els differents vitgs ein impurtonts, mintgin enonuscha mintgin e sa aschia animar in ni l'auter da vegnir a dar ballapei. Quei mument che tut ei centralisau ei quei bia pli grev.» In dils problems ein ils viadis ch'ils juniors – gest tenor vegliadetgna – ston far als trenaments. Tenor Daniel Carigiet sa quei buca vegnir impediù, surtut era sch'ins emprova dar formar las equipas tenor la fermezia dils giugadurs: «Nus empruein veramein da far tut il pusseivel per ch'ils viadis seigien buca memia liungs e numerus, mo ei va buca adina.» Il diember da junioras e junioras en Surselva duess star constants ils proxims onns.

In'equipa da junioras?

Il ballapei da dunnas ei sesviluppau positivamein ils davos onns, era en Svizra. La Surselva dispona d'ina gruppaziun cun Domat. Dalla Surselva senza dat in'equipa da dunnas ella 4. ligia e sco ei vesa ora il mument savess ei esser pusseivel ch'ei dess prest era in'equipa da junioras. «Sche zaco pusseivel lessen nus formar igl atun in'equipa sulettamein cun buobas. Nus havein ussa 17 ella vegliadetgna da junioras D/E, pia ella vegliadetgna entuorn 12 onns. Quella dess lu encunter ils buobs, mo savess lu sepreparar pil campinadi da buobas en in ni dus onns», di Daniel Carigiet. Ei seigi previu da menar discuors culs geniturs en quei connex. El campinadi cun buobs astgan las buobas esser in onn pli veglias che lezs.